

# Powšitkowne WOZJEWJENJA

njedźelu, 3. oktobra 2021

## Wusyłanje Božej mše

Serbskorěčnu Božu mšu móža wěriwi tutu njedźelu, 3. oktobra, znova jako livestream w interneće sčehować. Wona přenese so w 9 hodź. z Chróšćanskeje cyrkwy. Link na nju je pod [www.posol.de](http://www.posol.de) a na wosadnej stronje podaty.

## Duchowna hudźba

W Budyskej tachantskej cyrkwi budže tutu njedźelu, 3. oktobra, we 18.00 hodź., koncert duchowneje hudźby. Jón wuhotujetaj z Baćonja pochadźacy organist Tomaš Žur na piščelach a Gerold Gnausch na saksofonje. Zaklinča mjez druhim twórby Dietricha Buxtehudy, Leona Boëllmanna a Ethelberta Nevina. Přizjewjenja su trěbne. Link je pod [www.posol.de](http://www.posol.de) wozjewjeny. Zastup je darmotny, při durjach pak budže zběrka.

## Nyšpor dekanatneje młodžiny

Dekanatne dušepastyrstwo za młodžinu přeprašuje młodostnych na nyšpor do Róžeńčanskeje swjatnicy. Tutón wotměje so sobotu, 9. oktobra, w 19 hodź.

## Zhromadnej dnjej za džěci

Džěci 1. a 2. lětnika su štwórtk, 21. oktobra, wot 9 do 15 hodź. na zhromadny dzeń do Don Boskoweho domu we Worklecach přeprašene. Zhromadny dzeń za džěci 4. a 5. lětnika pak wotměje pak so hižo wutoru, 19. oktobra, tohorunja wot 9 do 15 hodź. na samsnym městnje. Zajimcy za wobaj dnjej měli so hač do wutory, 12. oktobra, online přizjewić. Linkaj staj pod [www.posol.de](http://www.posol.de) podatej. Za wudawki dnja zběra so wot kóždoho wobdžělnika přinošk, kotryž wučinja štyri eura.

## Kubłanske dny za młodžinu w Schmiedebergu

Dekanatne dušepastyrstwo přeprašuje serbskich młodostnych na kubłanske dny do Winfriedoweho domu w Schmiedebergu. Tute wotměja so wot pjatka do njedźele, 15. do 17. oktobra. Přizjewjenja přijimuju hač do wutory, 5. oktobra, online. Link je pod [www.posol.de](http://www.posol.de) wozjewjeny.

## Termin jězby do Oberammergauwa

Wšitkim, kotřiž su so za jězbu na pasionske hry do Oberammergauwa přizjewili, podam nětko termin. Jězba z busom budže klětu wot pjatka do njedźele, 27. do 29. meje. *J. Špitank*

## Pomocna akcija spočatk nowembra

Towarstwo Cyrila a Metoda z.t. chce ze swojej akciju „Łužica pomha“ lětsa znova diecezanski zwjazk Carity w pólskim Ełku podpěrać. Předwidžane je, zo přijědže tamniši direktor Carity, prelat dr. Dariusz Kruczyński, spočatk nowembra do Łužicy po dary. Datum hromadženja so sčasom wozjewi.

## **Potrjechenym powodženja w zapadze pomhać**

Za wopory powodženja w zapadnej Němskej hromadži Towarstwo Cyrila a Metoda z.t. (TCM) ze swojej akciju „Łužica pomha“ dary za potrjechenych wosady we Weilerswische juhozapadnje Kölna. Tam bydlaca młoda serbska swójba je zwisk sposrědkowała. Pjenježne dary móža so na konto Cyrill-Methodius-Verein e.V., IBAN: DE 65 750 90 300 000 828 23 66, pod hesłom „Weilerswist“ přepokazać. Štóž swoju dospołnu adresu poda, tomu wustaji TCM darowansku kwitowanku.

## **Biskopa Spülbeckowy wizionarny wobraz wo cyrkwi**

Smochčanske kubłanišćo swjateho Bena přeprošuje wšitkich zajimcow na seminar wo biskopa Otta Spülbeckowym wizionarnym wobrazu wo cyrkwi a jeho wuznamje za přitomnosć. Tón wotměje so wot pjatka do njedzele, 15. do 17. oktobra, z prezidentom Centralneho komiteja katolikow (ZdK) dr. Thomasom Sternbergom a Drježdžansko-Mišnjanskim biskopom Heinrichom Timmereversom. Pod nadpismom „Jedni we wěrnosći a wjeselu“, hesle biskopa Otta Spülbecka, budu Christian März (Drježdžany), Ralf Miggelbrink (Essen), Joachim Schmiedl (Vallendar) a Peter-Paul Straube (Budyšin) přednošować. Na programje steja tež rozmołwy z časowymi swědkami kaž z emeritowanym biskopom Joachimom Reineltom a bamžowskim čestnym prelatom Bernhardom Rachwalskim. Wjeršk seminara ma być Boža služba z biskopom Timmereversom, po kotrejž ma so žurla Smochčanskeho kubłanišća na Žurlu Otta Spülbecka pomjenować. Na njej zahaji wón za Drježdžansko-Mišnjanske biskopstwo wot bamža Franciskusa wuwolany swětowy Synodalny puć. Do toho budže w 15 hodź. na samnym městnje Thomas Sternberg k temje „Što je naš přinošk za swět? – cyrkej w Němskej před synodu w Romje“ přednošować. Zajimcy za přednošk a kemše měli so přizjewić. Link k tomu je pod [www.posol.de](http://www.posol.de) podaty. Štóž so za cyłkowny seminar zajimuje, měł so hač do pjatka, 8. oktobra, pod [www.bildungsgut-schmochtitz.de/anmeldung](http://www.bildungsgut-schmochtitz.de/anmeldung), z mejlku pod [info@bg-schmochtitz.de](mailto:info@bg-schmochtitz.de) abo telefonisce pod čisłom (03 59 35) 2 20 přizjewić. Tam zhonja tež płaciznu. Wobdźelenje na jednotliwych dnjach je tohorunja móžne. Studenća dóstanu 50procentowske potuńšenje.